

EGUNKARIA BERRITURIK. Euskal kulturaren ordezkariak gustukoak dituzte Egunkariaren berrikuntzak

Harrera ona izan du EGUNKARIAren diseinu berriak

Aldaketa onerako izan dela diote, eta 10. urteurrena gogo onez ospatu dute

Juan Luis Zabala | DURANGO

EGUNKARIA-ren diseinu berriak harrera ona izan du kulturaren arloko jende ezagunaren artean, atzo Durangon gai horretaz egindako galdeketa txiki batek erakusten duenez. Batzuek argia dela azpimarratu dute, erakargarria iruditu zaiela besteek, eta denek pozgarritzat hartu dute Egunkaria-k hamargarren urteurrenean erakutsi duen osasun ona.

MARTIN UGALDE (Idazlea)

«Hamar urtetan egin dugu miraria»

Martin Ugaldek bi poz handi izan zituen atzo goizean Durangon: batetik, egunkariaren hamargarren urteurrenean egunkaria berritua jaso zuen; bestetik, Mohamed eta parroko gorria bere nobela berriaren ale bat eskuratu zion, Elkarlanean argitaletxearen izenean, Xabier Mendiguren Elizegik.

“Hamar urtean ezin dira mirariak egin”, adierazi zion egunkaria-ri Ugaldek, umorez. “Mirari bat egiteko gutxienez ehun urte behar dira, eta Vaticanoa-ekin eta apezekin mila urte. Guk hamar urtetan egin dugu miraria. Zer nahi duzu gehiago?”

Diseinu berria gustukoa du

Ugaldek, baina badaki ahalegin bat eskatuko diola hasieran irakurleari, eta baita Egunkaria-ko langileari ere. “Ohitu egin behar da, eta horretara egiten garenean, nik uste dut konturatuko garela aldaketa onerako izan dela”.

JON MAIA (Bertsolaria)

«Erakargarria iruditu zait diseinu berria»

Jon Maia bertsolariak “kalitateari begira aurrerapauso bat dela”, uste du diseinu berriaz. Egunkaria-ren hamargarren urteurrena, berriaz, “amets baten gauzatzea” da, Maiaren iritziz. “Orain segurantzza batekin esan dezakegu egunkaria finkatuta dagoela, eta, dudarik gabe, euskararen historian azken hamarkadetan gertatu den gauzarik garrantzitsuenetako bat iruditzen zait hori. Astelehenetan hartzen noiz hasten garen zain gaude orain”.

TXUTXI ARIZNABARRETA (Sindikalista)

«Denontzat da oso ona EGUNKARIA indartsu ikustea»

“Izugarritzko poztasuna da gaur egunkaria diseinu berriarekin ikustea”, esan zigun atzo eguerdian Txutxi Ariznabarreta sin-



PABLO S. QUIZA
Jon Maia bertsolaria, atzo, Durangoko azokan.

dikalistak. “Euskaraz bizi nahi dugun euskaldunontzat egunero kioskoan, normaltasunez, egunkaria izatea garrantzitsua bada, hamargarren urtean indartsu ikustea are pozgarriagoa da. Hori denontzat oso ona da: Euskal Herriarentzat, eraikuntza nazionalarentzat, euskararentzat berarentzat, eta baita bakoitzaren osasun mentalarentzat ere”.

JOXEMARI ITURRALDE (Idazlea)

«Goizean hartu eta sustoa izan dut, sustoa onerako»

EGUNKARIA diseinu berriarekin ikusteari “zoragarri” iritzi zion, atzo, Joxemari Iturralde idazleak. “Goizean hartu esku artean eta sustoa izan dut, baina sustoa onerako. Beharrezkoa zen. Niri asko gustatu zait diseinu berria”. Egunkaria-ren hamargarren urteurrena ere poztasun handia da Iturralderentzat.

“Izugarri poztu ginen irten zenean, eta izugarri poztu gara oraingo ospakizunean. Eta ziurnago beste hamar urte ez, beste ehun urte ere segituko duela”.

JON ARANO (Idazlea)

«Duela sei edo zazpi urte baino gehiago iraungo digu esku artean»

Duela sei edo zazpi urte baino gehiago iraungo digu orain esku artean egunkariak”, esan zuen atzo Jon Arano, Ostiela! aldizkariako koordinatzaileak, Egunkaria-ren diseinu berriaz galdegitean. “Garai berrietara egokitu da egunkaria. Irakurleak nahastuta ibiliko gara hasieran, baina laster ohituko gara. Gipuzkoan, duela urte asko, La Voz de España desagertu zenean, El Diario Vasco irakurtzen hasi zen jendea, eta batzuentzat oso zaila izan zen ohitzea. Modu berean, guretzat ere

orain, hasieran behintzat, komeriak izango ditugu aldaketa berrietara egokitu ahal izateko”.

IMANOL UBEDA (Musikaria)

«Oso argia iruditu zait diseinu berria»

EGUNKARIA-ren aurreko diseinu aldaketek “noraezean” utzi zutela aitortu zuen Imanol Ubedak, Bide Ertzean musika taldeko kantariak, “baina hau oso argia iruditu zait”. “Poztekoa da egunkaria bezalako proiektu batek hamar urte betetzea”, azaldu zuen aurrerago Ubedak. “Ea aurrera egiten jarraitzen duen. Egunkari bat, bere xumean, oso proiektu garrantzitsua da kulturagintzaren arloan gabil-tzanontzat. Kalitate aldetik eta euskal kulturaren munduaren alde egiten duen lanarengatik, egunkaria indartsu ikustea oso pozgarria da denontzat”.

Durangoko Azoka 2000

URTERO EUSKAL KULTURARI EGIN, URTERO BBK AZOKAREKIN.
ZATOZ AZOKAKO BBKREN DENDARA, HANTXE ELKARTUKO GARA.



BBK
Bilbao Bizkaia Kutxa